

von Wulf Wager

## Liebr Knascht als Frau



Mr sott's net fir meglich halta, aber Sacha geit's, do schlag-gelscht mit de Aohra.

Guat, mr woiß jo, dass mr als Ma ema Dilemma ischt: Oi Frau isch z'viel, ond koine isch z'wenig!

Ond dass mr sich noch Jahrzehnte Ehe au auf d' Nerva ganga ka woiß mr au. Mr woiß au, dass a Scheidong an Haufa Geld koschtet. Ond

trotzdem oder deshalb suchat vrzweifelte Männer noch andere Ausweg' aus dene eheliche Kriegsjahre mit der ehemalige Liebschta. Manche Frau verwandlat sich jo em Lauf der Ehe voma kleina Tierle zoma graoßa Viech: vom Häse zur Habergoiß.

En Amerika – wo au sonscht – hot jetzt en 70-jähriger Rentner a Bank ibrfalla ond schee gwartet, bis d' Polizei kommt. Des isch schnell ganga, denn er hot sich a Bank direkt neba ma Polizeirevier rausgsucht. Er hot a Zettele über da Tresa g'reicht, wo drufgstanda isch, dass'r Geld will. No hot em der Kassier 3000,- Dollar geba ond der vrzweifelte Senior hot sich en an Sessel gsetzt ond gwartet bis dia Cops kommat. Bei dr Befragong hot er a'geba, dass er dia Bank bloß ibrfalla häb, damit'r von seim Weib wegkommt, weil er's dort nemme ausghalta hot. Noch 'ra Woch Gfängnis hend se den arma Kerle wieder entlassa ond hoim gschickt zu seim Weib.

Wie sich die Gschicht dort fortgesetzt hot isch leider net ibrliefert...

Bis näggschd Woch'

Ihr

Wulf Wager

Alle Kolumnen zum Nachlesen unter: [www.woascht.de](http://www.woascht.de)